



宮闈典第二十三卷

皇太后部藝文二

慰皇太后表

宋王安石

臣某言威靈有集方祔於廟祧感慕無窮外覃於蠻貊伏惟太后比賢任姒繼慶塗莘祇協孫謀克襄大事地非蒼梧之遠勢有霸陵之安唯割至哀尚膺遐福臣備官有守奔問無階云云

臣某言宗祐告成皇靈來燕凡居覆露同盡哀摧伏惟皇太后協慶塗山比賢太姒方正坤儀之位上同乾施之仁虞祔奄終攀號罔極冀哀恫之有節膺福履之無疆臣附守州符阻趨天陛云云

南郊青城皇帝問皇太后聖體表

前人

臣名言自宮徂郊夙夜祇事方此寒沴闕於定省伏惟比日寢食宜加

皇太后回答皇帝問聖體書

前人

太后致書於皇帝躬率羣臣肇見祖考孝思之至何以自勝尚慎興居以保休福

崇先觀開啟太后本命道場青詞

前人

伏以克紹慶基實蒙慈訓邁茲元命若昔宗祐冀靈鑒之俯昭垂壽祺之永錫

靈釐殿開啟太后生辰道場青詞

前人

伏以集黃冠之勝衆仰紫極之真游按用科儀營祈祉福仰求聰鑒俯應誠心

太一宮開啟太后生辰道場青詞

前人

伏以真聖在天式序照臨之位眇冲嗣歷永惟顧復之恩敢因誕毓之辰祇薦薰修之事仰祈眷祐
俯察傾輸推純嘏以及親與羣生而均覲

龍圖閣開啟太后生辰道場青詞

前人

伏以妙善可依每俯從於誠悃至恩難報唯仰祝於壽祺祇奉靈科隆施淨供上賴鑒歆之力永綏
顧復之慈

萬壽觀廣愛殿資薦章惠皇太后道場齋文

前人

伏以諱日俯臨詞庭外闕遜東黃冠之衆宗祐紫極之神按用前科追營後福庶超升之莫禦翳庇
睨之有加

延福宮開啟太后生辰道場青詞

前人

伏以協承寶命恩維拊育之深俯應羣情法有總持之妙齋場夙設慶事備終敢祐西竺之威神永佑東朝之福履

慰皇太后上仙表

蘇軾

伏覩正月十四日大行皇太后遺誥者慟發六宮悲纏九土奉諱哀殞不知所云臣軾中謝大行皇太后德冠三朝化行四海獨決大策措天下於泰山之安退避東朝復明辟爲萬世之法奄終壽祿莫曉天心恭惟皇帝陛下仁孝自天哀傷過禮唯聖達節豈復行曾閔之難以民爲心則當法舜禹之大願少寬於追慕庶下答於臣民臣以外郡居住不獲奔赴闕庭無任哀痛隕越之至

代普寧王賀皇太后冬表

前人

陽氣應時驗灰輕而權擁日表如度知歲美而人和慶自宮闈澤流寰宇中賀伏惟皇太后陛下性服慈儉體安禮儀同太姒之母周慕塗山之興夏仰推聖子坐底於成功抑損外家共陶於至化得天人之共助享福祿之無疆臣猥以辱虛夙承教育敢効岡陵之祝永同葵藿之傾

代曹寧王賀皇太妃冬表

前人

玉律灰除驗陽微之協應土圭景至迎初日之舒長福祿所鍾宮闈同慶中賀伏惟皇太妃殿下夙彰懿德早事先朝仁孝外全曲盡兩宮之養溫文內備下刑九御之風茂對休辰允綏眉壽凡託庇庥之賜不勝頌詠之情

隆祐宮設慶宮醮青詞元祐二年

前人

伏以長樂告成光動紫宮之像清都下照誠通絳闕之仙祇率多儀肅陳菲薦永惟慈孝之本克享天人之心介萬壽之無疆錫五福之純備

皇太妃宮慶落成開啟道場青詞

前人

伏以良辰襲吉華構一新仰荷褒崇之私得伸鞠育之報落成告備法會有嚴請命上穹馳神真聖庶精神之必達錫壽祉於無窮

內中御侍以下賀皇太后冬至詞語元祐二年十月二十日

前人

伏以矇瞍奏功驗人和於緹室日宮占物效歲美於黃雲慶自宮庭澤均海宇恭惟皇太后殿下降

佐內治儀刑王家推美國風夙茂周南之化考祥義易共成坤厚之功方迎日於三微敢稱觴於萬壽豈獨宮闈之願實同中外之懽妾等猥以微軀被蒙慈渥仰獻岡陵之祝庶殫草木之誠

又元祐三年十月三十日

伏以候氣葭灰喜律筒之已應課功綵線知宮日之初長品物向榮掖庭胥悅恭惟皇太后殿下母臨四海婦應東朝求賢審官但有憂勤之志躬儉節用豈忘澣濯之衣宜福祿之日康樂宮闈之無事妾等濫塵女職獲奉慈顏願先柏酒以稱觴更指椿年而獻壽

內中御侍以下賀皇太后年節詞語元祐二年十一月一日

前人

伏以三元資始碟禳以餞餘寒萬寶更新熿烈以興嗣歲恭惟皇太后殿下道光嫡汭德配周南輔導兩朝孝慈格於上下儀刑九御恭儉聞於遐邇順履三陽誕膺百祿妾等幸班禁掖久被餘光莫報生成之恩但祝靈長之算

賀皇太后箋

陸游

聖子問安方極蘭陔之養神孫正內肇新椒掖之華母道彌尊人情溢喜中賀恭惟皇太后殿下抱

神以靜存心於淵德修蜩蠅曠漠之中化行崕崙磅礴之外唐虞盛際迺出一家父子之親任姒徽音仍見三朝婦姑之法方且享宗社奠安之福視本支蕃衍之祥於古有光與天無極臣等幸逢熙運獲綴清班至哉坤元實首彝倫之叙養以天下益觀孝治之隆

賀壽成皇后箋

前人

盛德繼承爰本親傳之妙中宮崇建式光就養之尊慶集禁庭懽傳海宇中賀恭惟壽成皇后殿下婦功飭備母道含洪羽老氏之儉慈享周家之福祿密贊乾剛之斷神器有歸助成離照之明天心允答惟每思於靜順故備極於安榮袞龍兼綵服之紓褕翟煥玉卮之奉貴無倫敵日以舒長簡冊煜其有光風俗爲之丕變臣等幸逢熙運獲相多儀坤順承天喜徵音之克嗣孫又有子知壽祉之無窮

丞相率百僚賀太后受冊箋

前人

獻歲發春太史奏元龜之吉迎禧展案東朝慶大典之成佳氣一新懽聲四溢中賀恭惟壽聖皇太后殿下聰明睿智壽富康寧踐履艱難佐高廟廊清之烈遵行恭儉啟壽皇詒燕之圖肆因初元祇

奉顯冊聖篆蟲魚之古樂陳鐘磬之和內而百官有司方屏息而觀盛事外則萬方黎獻咸拜手而頌閔休載稽前聞可謂盡美臣等偶叨在列獲際昇平有子而又有孫共仰本支之盛祝今猶之視昔前知竹帛之傳

丞相率百僚賀壽成皇太后受冊箋

前人

宮臺塗椒德配重華之盛冊書鏤玉禮行路寢之嚴聖孝益隆輿情交慶中賀恭惟壽成皇太后殿下儉慈性稟柔順躬行至哉坤元象服早光於內治養以天下寢門方奉於母儀今者稽參六藉之文博盡諸儒之議建此顯號適於前聞仰惟貴無敵而富無倫是謂仁之至而義之盡臣等偶緣在列獲遂逢時紀媯汭塗山之興幸窺簡牘繼生民思齊之作尙播聲詩

謝皇太后表

文天祥

司平楚甸命出嚴宸告至周原恩歸慈極敢敷睿訓仰謝徽音伏念臣一介寒微兩朝知遇傾葵向闕初無補於使令啜菽杜門祇自深其觀省當元日會同之始拜公朝拭之仁言遣使臣往陳臬事華省遄頒於趣旨叢祠竟秘於僉音勉臣子之驅馳見吏民而宣布茲蓋恭遇壽和聖福皇太后

陛下心超有極道合無疆長信怡愉贊炎圖之昌運大任肅穆開蒼籟之隆平宜擇攸司俾敬爾獄
臣敢不丕承欽恤誕布慈仁父我黎民尙想無刑之治于其王母敢忘介福之元

東朝鴻慶介壽無疆南國虎符便親有命荷中宸之渙寵望慈極以阪悅伏念臣一介迂疎兩朝遭
遇昔備殫於數歷無以逾人頃間任於驅馳不遑將母惟內懷於烏哺遂上徹於蟻忱果分二水之
麾爰易三湘之節惟壤地接故可以供菽水之職惟土風習故可以盡芻牧之心自省叨喻若爲報
稱茲蓋恭遇壽和聖福皇太后陛下德光堯母功配周姜壽錫萬年享怡愉之福化流四海推慈孝
之仁遂令下吏之僥榮獲以邇封而就養臣敢不祇承德意誕布恩言服膺錫類之詩益崇美化拜
手牧民之訓喻贊徽音

鳳曆頒春東朝介福虎城告朔北面承休歲定四時天佑一德恭惟皇太后陛下思齊肅穆少廣怡
愉訓示塗山曆開禹子教行渭渙紀協周王春朔攸頌乾坤交泰臣承流下障奉令孟陬協和萬邦
第贊定時之績嚮用五福益陳曰壽之休

賀皇太后表

前人

福於王母際南面之昌期天以神孫娛東朝之永日畫堂瑞節長樂歡聲恭惟壽和聖福皇太后德
蘊冲和仁培靜壽思齊所以聖也以御於邦螽斯宜爾孫兮克開厥後皇皇穆穆繼繼繩繩臣迹滯
騏原心馳鳳闕本支百世播綿瓞之聲詩怡愉萬年衍含飴之福慶

東朝保艾方隆堯母之仁西國分茅式篤文孫之慶兩宮喜色萬宇懽聲恭惟壽和聖福皇太后陞
下德厚慈元神怡長樂尊之至也上承視膳之勤宜爾繩兮下適含飴之趣瑤池日永玉葉春濃臣
遠被繡衣喻瞻深仗子其王母知介壽之來崇佑我後人願丕圖之有衍

周家福祿積由任姒之仁堯母聖神親覩娥英之慶宮闈盛典海宇懽聲恭惟壽和聖福皇太后陞
下南極景光東朝綦貴有功寶祚既開聖子之傳流澤銀潢爰毓天孫之瑞贊初封於沁水同上壽
於瑤池臣遠玷皇華喻瞻長樂怡愉太后諒承婉婉之娛雍肅王姬益表儉慈之教

於萬斯年慈宸有慶誕彌厥月祖佛同生旒冕敬共縉紳舞蹈恭惟壽和聖福皇太后陛下道超太
始德厚重坤闢唯周南之風夙陶美化思齊文王之母懋著徽音袞衣初奏於薰絃宮佩畢朝於慈
辰親下袞龍之拜載揚韶鳳之音呼萬歲者三歡騰朝野等百世而上福衍子孫臣叨守魚符莫陪

鴻序我百而爾九十諒喜溢於舉觴心一而臣三千第神馳於拱極

金闕日長尊處宸闈之極玉卮春滿誕膺法駕之朝凡在式圍率均擊壤恭惟壽和聖福皇太后陛下心遊恬淡德著慈仁隆周召之風人倫既正養黃老之性母道獨尊皇穹甲方至之休壽命衍無疆之算臣猥分郡組共貳戎韜迹遠輶移帷幄愈瞻於長樂枕同葵藿笙璈益想於承華

六龍御極增光長發之詩萬國同心推本思齊之聖驩騰宮壺和塞堪輿恭惟壽和聖福皇太后陛下曰希曰夷爰清爰靜以天下養備百祿之熾昌與元氣游葆六根之純粹海內樂唐虞之化宮中頌任姒之音臣叨預承流遙申歸美冬溫夏清禮嚴東面之朝日升月常福等南山之祝

天下傳歸於子降寶冊之鴻名聖人教愛以親上玉卮之曼壽非常之慶嘉頌攸同恭惟壽和聖福皇太后陛下冲澹頤神儉慈孚化輔佐先帝夙殫卷耳之勤愉快東朝允著思齊之聖昉前殿紀誕彌之旦正羣方傾就望之忱肆膺鳳輦之朝親下龍綃之拜臣屬糜戎鍵阻綴班行現五色之雲知獻占於太史舞兩階之羽諒增喜於慈顏

東朝介福式彰母道之尊南國分封庸迪孫謀之吉兩宮交慶百世彌昌恭惟壽和聖福皇太后陛下

下長樂怡愉大庭游衍養以天下日永瑤池正於家人春生玉葉贊苴茅於潛水壯綿瓞於宗藩臣
逖在侯方阻瞻宸仗思齊所以聖遜頌徽音皇矣莫若周益隆世德

堯母怡愉介於景福湯孫岐嶷錫以嘉名慶衍宗枋懼隆慈極恭惟壽和聖福皇太后陛下爰清爰
靜曰希曰夷佐先帝之中興鷄鳴有度膺嗣王之孝養燕翼成謀爰鍾愛於綠車乃分符於赤社臣
恪恭武服阻造王庭以御于家喻贊思齊之德克開厥後佞性成皇武之功

肇聖德之龍飛運開昌曆垂孫謀之燕翼功出慈宸九廟奠安八紘忭蹈恭惟壽和聖福皇太后陛下
下道光任妙行邁塗莘範肅東朝性適含飴之樂規重南面養親視膳之榮光昭嫡統之傳丕衍皇家之慶臣叨紓守綏阻造賀班頌皇帝之萬年永言齊壽佑寧人之大曆尚克圖功

震出麗天重明繼序坤稱正位一統蒙休基祚斯皇幅員胥慶恭惟皇太后陛下輔佐先帝憂勤王
家思媚周姜履肅雍於京室訓貽禹子服勤勞於塗山瑞昭南面之符光疊東朝之矩臣屬靡侯服
踰企慈帷嫡統無疆已慶大橫之兆嗣徵有秩尚稽小毖之謀

震主宅尊光紹寧王之命坤元居正適彰太姒之音一統親傳萬邦胥慶恭惟皇太后陛下功侔持

載德備含弘風化二南衍傳家之忠厚本文百世肇繼序之聖明大春秋正嫡之書應日月重光之運臣屬兼鈴紱阻造軒帷在天利見大人已孚文命介福於其王母長咏思齊

統繼堯天重華協德位隆文母太姒嗣音實宇休明內廷肅穆恭惟皇太后陛下行高配地功大補天輔先帝以重光憂勤夙至肇嗣王之丕緒福祿方來奉寶冊於重圍壽皇圖於履載臣屬糜郡紱阻造廷紳咸曰太皇已慶元和之壽願言帝母永肩長樂之名

晉大號於慈闡位降長樂紹丕基於萬世慶本慈元命肅治朝禮行廣內恭惟皇太后陛下頤神沖澹履行靜專美紹思齊宜毓文王之聖訓垂訪落實開成后之謀贊重慶於御簾推有尊於臨制臣猥分戎轄踰聽恩綸望少廣之宸居莫班獸舞頌長秋之壽曆同播鴻名

坤稱正位訓迪嗣王渙號揚庭尊歸文母簾帷介福祉稷垂榮恭惟皇太后陛下德著憂勤躬行慈儉虞嬪觀於澮汭密贊聖謨后稷生於姜嫄美鍾神胄晉長信尊尊之號嗣思齊秩秩之音臣忝守藩維阻趨軒陛得其名得其壽幸同萬國之歡宜爾子宜爾孫永頌兩宮之慶

文母克昌厥後光紹皇圖大德必得其名慶隆寶冊四方來賀百志惟熙恭惟皇太后陛下陰教齊

家慈元正位推爲美化邁周召之二南著在徽音紹姜任之大雅宜膺渙號增重坤稱臣適貳韜鈴
聳聆綸綺踐其位行其禮莫重尊親求厥靈觀厥成遙追來孝

龍德方升祥書載震燕謀有慶福萃重坤旗翼光華幅員熙洽恭惟皇太后陛下道侔博厚德備仁
明虞汭來嬪女於舜帝周京作配生此武王方觀日上於扶桑隨紀虹流於華渚臣濫叨一障陰企
千班大域中王旣祝華封之壽爲天下母願齊西極之年

辛歲重光昔符夢日乾元首出今紀流虹歡溢華封慶歸長信恭惟皇太后陛下徽音大雅美化二
南德配重華觀嬪于汭祥開長發立子生商扶陽谷之初升紀高祿之載誕臣領鈴偏郡銜表明廷
五百歲河清旣覩聖人之出三千年桃實願同王母之尊

春秋以一爲元曆開昌運闢雌之化正始本在慈宸正朔更新國家胥慶恭惟皇太后陛下有娀長
發太姒思齊齊壽以奉太皇德惟子肖受福而于王母祐自天申宜渙號以繫年示同文而更始臣
猥乘一障丕戴三宮當昌歷應休期已供侯服綏眉壽介繁祉益贊母徽

皇太后加尊號鈴司賀皇帝表

重明以繼大人瑤圖垂慶介福而于王母玉冊有光瑞溢簾帷重闢宗祐恭惟皇帝陛下敬仁成性
曆數在躬惟后綏猷蹈堯舜之孝弟因親教愛奉任姒之肅雍宜申慈極之尊式表聖倫之至臣叨
兼兵輔諭企陞廉贊長信之徽稱已光漢制誦塗山之丕訓益大禹功

皇太后加尊號本州賀皇帝表

前人

嗣王受此丕基光膺明命文母介以繁祉祇奉嘉名典冊流輝幅員有慶恭惟皇帝陛下一人出震
五位乘乾玉質金相嗣延洪之大曆寶祚羽翟奉雍肅之徽音光進瑤編重增鼎祚臣叨分虎壘踰
望龍墀保佑恩深已際大明之運怡愉樂永更揚齊壽之休

慰皇太后表

前人

皇靈新陟變撫遺弓儻極永懷悲興捐玦六宮哀痛九宇摧傷恭惟皇太后陛下坤道宅中家人位
正脫簪而諫期共濟於中興綴衣於庭忍遽聞於末命雖委裘之悲至切而定鼎之託方新願制盡
傷永綏數遺

變興培野九土烏號悲結椒塗六宮縗哭宅憂罔極降割何深恭惟皇太后陛下志紹徽音躬行美

化冬溫夏清佐孝養於東朝海潤星暉演慶源於中壺驟撫鼎湖之戚奚堪輿極之哀願抑慈懷聿

扶新政

雲升梧野頓隔千秋日短蔓階駕言十浹委裘禍迫捐玦哀深恭惟皇太后陛下教盡人倫慶隆母道雖易月以日難窮伉儷之悲然薦子於天正重攜持之託願俯從於中制用式副於羣情

悲捐玉玦痛極呼天祭服練冠制嚴易月乘雪浸遠濡露何堪恭惟皇太后陛下德佐先猷慶鍾神宵雖傍徨虞汭望欲斷於蒼梧然婉變周姜任方隆於京室願少寬於哀抱用不贊於鴻圖

望斷乘雲悵龍驥之浸邈制嚴易月恍鳳曆之再周凡屬幬封式同追慕恭惟皇太后陛下承天功大與子仁深雖悼舜陟方不替蒼梧之望然開周嗣歷方隆豐芑之休願少抑於哀悰用永綏於神器

宮車輶駕浸遠翠華國典行櫨恍終素蹕託言釋禫胡忍免喪恭惟皇太后陛下夙著脫簪驛罷捐玦雖梧雲不返永爲禪翟之傷然芑水方來共篠簾帷之助願釋居諸之感俯從遐邇之情
九疑陟遠莫返皇靈七廟升宗聿彰世德洪名有赫哀抱彌深恭惟皇太后陛下位正家人道隆坤

母躬萬覃之節儉厥配有光秉清廟之肅雍于嬪增感於惟大冊肆對皇穹臣跡繫分符神馳望闕
云云

大德得名尊歸昭考嗣王謀廟上奉徽音宗禡休揚宮幃愴極恭惟皇太后陛下儉昭練服中協黃
裳嗣任德之肅雍思齊以聖名堯功之巍蕩煥有其章聿深羽翟之懷於赫軒壇之告臣猥兼戎轄
諭贊邦彝云云

復陽在地氣應黃鍾坤德承天悲深素蹕六宮增疚萬宇永懷恭惟皇太后陛下長信宅尊思齊繼
美手扶宮日坐占千歲之長目斷臺雲尚想九疑之遠願紓哀於儻極以永翼於皇圖臣逖守江城
踰瞻禁闕云云

龍湖言遠椒掖永懷鳳翫戒嚴斂斂塗載闢六宮雨泣萬宇雷哀恭惟皇太后陛下儻極勳高正家化
洽撫軒皇之劍舄祔賁橋山奉舜帝之衣裳思藏梧野尚軫乾坤之記願紓朝夕之思臣身繫分符
神馳攀繩云云

國謹重喪龍棺就殯禮襄大事欽披興懷海宇同哀山陵告備恭惟皇太后陛下憂勤孔夙哀感謹